

Na osnovu člana 19. stav 1. Zakona o Vladi Federacije Bosne i Hercegovine ("Službene novine Federacije BiH", br. 1/94, 8/98, 58/02, 19/03, 2/06 i 8/06) i člana 9. Zakona o prestanku primjene Zakona o odbrani Federacije Bosne i Hercegovine ("Službene novine Federacije BiH", broj 2/96), Vlada Federacije Bosne i Hercegovine na 80. sjednici, održanoj 26.08.2013. godine, donosi

U R E D B U

O PRIVREMENOM PREUZIMANJU DIJELA FUNKCIJA PRIJAŠNJEG FEDERALNOG MINISTARSTVA ODBRANE IZ OBLASTI VOJNIH EVIDENCIJA

Član 1.

Ovom uredbom, privremeno se do stupanja na snagu Zakona iz člana 5. ove uredbe, utvrđuje organizacija izvršavanja dijela funkcija prijašnjeg Federalnog ministarstva odbrane, koje su u skladu sa članom 72. i članom 80. Zakona o odbrani Bosne i Hercegovine ("Službeni glasnik BiH", broj 88/05), preneseni u nadležnost entiteta, kantona, općine, a odnose se na:

- poslove evidencija o činjenicama iz oblasti reguliranja vojne obaveze, angažiranju u formacijama oružanih snaga tokom odbrambeno-oslobodilačkog rata u Bosni i Hercegovini, odnosno formacijama Armije Republike - Bosne i Hercegovine i Hrvatskog vijeća obrane, nadležnog organa unutrašnjih poslova, civilnoj zaštiti, organima i pravnim licima, vođenje evidencija o osobama koje su tokom izvršavanja vojne obaveze povrijeđeni, ranjeni, poginuli, nestali, vođenje evidencija o dodijeljenim vojnim odlikovanjima i priznanjima, vojnim činovima, formacijskim dužnostima i izrečenim sankcijama tokom vojne službe;
- preuzimanje vojno evidencionih dokumenata evidencije iz komandi, jedinica i ustanova Armije Republike Bosne i Hercegovine i Hrvatskog vijeća obrane (VOB-8 i po potrebi druga dokumentacija), izdavanje uvjerenja o činjenicama iz službene evidencije.

Član 2.

Poslove iz prethodnog člana će preuzeti Federalno ministarstvo za pitanja boraca i invalida odbrambeno-oslobodilačkog rata/Federalno ministarstvo za pitanja branitelja i invalida domovinskog rata (u daljem tekstu: Federalno ministarstvo). Za izvršavanje poslova iz člana 1. ove uredbe Federalno ministarstvo će u Pravilniku o unutrašnjoj organizaciji, formirati unutrašnju organizacionu jedinicu.

Član 3.

Plaće i druga primanja uposlenika na poslovima vojnih evidencija obračunat će se prema Pravilniku o plaćama i drugim primanjima Federalnog ministarstva za pitanja boraca i invalida odbrambeno-oslobodilačkog rata - Federalnog ministarstva za pitanja branitelja i invalida domovinskog rata.

Član 4.

Federalno ministarstvo će preuzeti državne službenike i namještenike u skladu sa članom 73. Zakona o organizaciji organa uprave u Federaciji Bosne i Hercegovine ("Službene novine Federacije BiH", broj 35/05).
Federalni ministar će u skladu sa Pravilnikom donijeti rješenja o unutrašnjoj organizaciji i sistematizaciji i raspoređivanju preuzetih službenika i namještenika prijašnjeg Federalnog ministarstva odbrane.

Član 5.

Uredba o privremenom preuzimanju dijela funkcija prijašnjeg Federalnog ministarstva odbrane iz oblasti evidencija o vojnoj obavezi, primjenjivat će se od dana 14.08.2013. godine i važit će do usvajanja izmjena i dopuna Zakona o federalnim ministarstvima i drugim tijelima federalne uprave ("Službene novine Federacije BiH", br. 58/02, 19/03, 38/05, 2/06, 8/06 i 61/06).

Član 6.

Ova uredba stupa na snagu danom objavljivanja u
"Službenim novinama Federacije BiH".

V broj 860/2013
26. augusta/kolovoza 2013. godine
Sarajevo

Premijer
Nermin Nikšić, s. r.